



**2016-imi aasartinnagu Telepost A/S-imi piginnittuunermut periusissiamik ersarissumik Naalakkersuisut suliaqarnissaannik Inatsisartut aalajangiiffigisassaattut siunnersuut. Piginnittuunermut periusissiami tele-p iluani namminersortunngorsaanissami persaarutit naatsorsuutiginninnerillu ersarissumik allanneqarsimassapput. Tamatuma saniatigut ingerlassanut Telepost A/S aningaasaliinissaanut qanoq naatsorsuutiginninnerit ersarissarneqarsimassapput, taakkunungalu søkabel-ip tallineqarnissaanut radiokæde-llu pitsanngorsarneqarnissaanut pisat ilaapput.**

(Inatsisartunut ilaasortaq Kalistat Lund, Inuit Ataqatigiit)

Inuiaqatigiittut teknikkikkut atugartuussutsikkullu ineriartorsimanerput, aamma inuiattut nunarsuarmioqataasutut avammut alakkaamasaqarnissatsinnut appakaaffeqarsinnaanissarput Telepost A/S-ip assut periarfissagissaartippaa. Imaappoq, nunatsinni aaqquussisimanerput malillugu Telepost A/S ullumikkut Kalaallit Nunaata nunarsuup sinneranut "qinngutaatut" Telepost A/S assersuunneqarsinnaavoq.

Taamaammat Inuit Ataqatigiit isumaqarpugut siunnersuuteqartoq Inatsisartunut ilaasortaq Kalistat Lund nunatta inuinit pingaaruteqarluinnartumik siunnersuuteqartoq.

Internet atorlugu attaveqaatinik atuisuusugut tamatta ilisimalluinnarparput, nunatsinni inuit qaammaasaqassutsitsinnut nunarsuarmioqataasutullu pisunut sunut tamanut malinnaanissatsinnut periarfissanik ineriartortitsiuartariaqarpugut. Ineriartornermili siunertaavoq nunatta inuisa amerlanerpaartaat Internet-imik atuinissamut periarfissagissaarnissaat, aamma akitigut. Ineriartortitsinerli pitsaasoq akit annertussusaasa ajornanngitsumik innarlarsinnaagaat naluneqanngilaq.

Inuit Ataqatigiit ersarissumik naqissusissavarput pingaartilluinnaratsigit Telepost A/S pillugu piginnittuunermut apeqqut eqqarsaatigalugu aalajangernissamut tunngaviit pingaarutillit suunersut aamma pingaartittariaqaaqavut suussanersut aalajangersaasoqartinnagu eqqartorneqaaqartariaqarsorigatsigit. Aningaasaq kisiat qitiutinnagu aamma nunatta inui qitiutillugit politikkikkut aalajangersaanissaq matumani pisariaqarpoq. Ilaannimi pisariaqartarpoq aningaasartuutit qaffasinneruleqqunagit aningaasartuutunik ataavartunik atuutitassanik pilersitsinissaq.

Inuit Ataqatigiit isumaqarpugut massakkut piffissanngortoq allannguinnissamut, naalakkersuinikkut "isussulluni sulineq" qimallugu ersarissumik paasineqarsinnaasumik siunnerfilimmik naalakkersuineq uterteqqinneqartariaqartoq. Ersarissumik akisarneq. Ersarissumik siunnerfeqarneq. Siuttutut tikkuussisinnaaneq naalakkersuniit ersialaartinneqarnerusariaqarpoq, aamma inuiaqatigiit piginneqataaffigisaat ingerlatseqatigiiffiit eqqarsaatigalugit.

Tassami naalakkersuisut aperineqarsinnaapput soq Telepost A/S namminersortunngorsarniarpaat? Suut siunertat taamatut aalajangernermi qitiutinneqarpat? Inuiaqatigiit atuinermi akit nammataassarisaat soq sunniuteqarfigisinnaajunnaassavagut? Aningaasarsioinikkut iluaqutissat suut naalakkersuisuniit anguniarpisigit? Apeqqutissarpassuusinnaagaluarpud namminersortunngorsaaniermi tunngaviit akiuminaatsinneqartartut paaserusunnartaraluarmata. Akiuminaatsinneqartarmataklit tupinnartuliaanngilaq.

Telepost A/S namminersortunngorsarneqassagaluarpat suliassarfinnik tiguisissat iluanaarfiusumik aningaasarsiorfiusinnaasut kisiisa tiginissaat soqutigissavaat. Taamaalissappat nunatta inui isorliunerusuni najugaqartut akit qaffasissut tunngavigisariaqalissavaat, tassami aningaasartuuteqarfiusut iluanaarfiunngitsullu kisiisa inuiaqatigiit attuumassuteqarfigilissamatikkat.

Inuit Ataqtigiit namminersortunngorsaanissaq isumaqatiginngilarput. Nunatsinni inoqarfinni tamani pingaartumik aamma nunaqarfinni nunaqarfinni atuartaaneq minnerunngitsumillu ilinniarnermik ingerlatsillualernissamat sakkussat pingaaruteqarluinnartut ilaat, tassalu, internet-ikkut attaveqaatit teknikkikkullu ineriartornermik periarfissinneqarnissaq nunatta allanut suliassanngorlugu imissutigisinnaangilaa. Taamaattoqarsinnaangilaq.

Nammaqatigiilluta suleqatigiillutalu nunami inuit amerlasoorsuunngitsut siuarsaqatigiinnerat nukittorsarniartigu. Nukittorsaniarta siursaaniartalu immitsinnut ikiorluta aamma naalackersuinikkut tunuliaqutsiilluta. Tassami, kiap iluaqutigissavaa Telepost A/S-ip namminersortunngorsarnera? Iluaquserneqartussaannngitsut nalunngisavut tassaapput inuit nunatsinni najugaqartut.

Nammaqatigiinneq siuarsaqatigiinnerlu aamma teknikkikkut attaveqaatitigut siursaanermi pisariaqartilluinnarpagut. Nunami inuit siammasissumik najugaqariuseqartut atortulersuutunik nalitoorsuarnik aserfallatsaaliuartaqartunillu pisariaqartitsiffiuvoq. Inuiaqatigiittut iluanaarniarfissaannartut aqqissuunniarneqarnerput Inuit Ataqtigiit-nniit sakkortuumik uparuassavarput.

Namminersortunngorsaanierneq isumaqatiginagu matumuuna Inuit Ataqtigiit allannguutissatut siunnersuut imaattoq saqqummiutissavarput:

**Inatsisartut aalajangiiffigisassaattut siunnersuutigaarput naalackersuisut peqquneqassasut Telepost A/S namminersortunngorsarnagu inuiaqatigiit ingerlatseqatigiiffiutaattut ingerlaannassasoq. Nunatsinni inuit nammaqatigiillutik pitsaanerpaamillu kifpartuunneqarlutik teknikkikkut attaveqaateqarnikkut siursarnissaat suliarineqassamat, nunaqarfiit illoqarfiillu inui atuinermi akitigut artukkernagit ineriartortinnissaat siursarnissaallu aningaasalersinnaajumallugit.**

Siunnersuummut taamatut oqaaseqarluta Inuit Ataqtigiit inassutigissavarput Inatsisartut aningaasaqarnermut ataatsimiititaliaannut ingerlatinneqassasoq. Ataatsimiititaliami aningaasatigut sunniutissat aamma qulaajarluarneqarnissaat periarfissinneqarnissaat qulakkearniarlugu.